

LA EPISTOLA DEL APOSTOL SAN PABLO A LOS EFESIOS

YA'A KUU CARTA JA NI CHAA SAN PABLO APOSTOL NUU ÑAYIVI ÑUU EFESO

Sa'an kúta'u

1 Máá-rí kúu Pablo, apóstol Jesucristo, chi súan ni jata'an iní Dios. Te cháa-ri tutu yá'a nuu ñáyivi ndóo, ja káskíkuu va'a-i nuu Cristo Jesús, ja káxiukú-i iní ñuu Éfeso. ²Tu'un luu jíin tú'un kuaká'nu ío iní máá Táa-yo Dios jíin iní máá Jíto'o-yo Jesucristo, ná kóo jíin-ró jíin'an-ró.

Ná sikí ní teta'an-ya-yó

³Ná nákana jaa-yó Dios, I'a kúu Táa Jíto'o-yo Jesucristo. Luu ni sá'a-ya jíin-yó jíin táká tiñu sá'a Espíritu. Te ichi ándíví sá'a-ya-ún jíin Cristo. ⁴Nátu'un ni kaji Dios yóo nuu Jesús onde ná te jukuini-ga ñuyívi, náva'a koo ndoo-yó, te tú koo chá'an-yó núu-yá, te kundá'ú iní-ya yóo. ⁵Te ni teta'an-ya yóo náva'a naki'in sé'é máá-yá-yó sá'a Jesucristo, ndasa ni jata'an ya'a iní-ya sá'a-ya, ⁶náva'a ná nákana jaa-yó-yá jíin tú'un luu tu'un va'a ío iní máá-yá. Te jíin tú'un-ún ni ki'in sé'é-yá-yó ndúu jíin-yó jíin

Cristo, I'a kundá'ú iní-ya. ⁷Te I'a-ún, ni nakuaan-ya yóo jíin niñi-yá. Te ni chaxio-ya kuáchi-yó jíin tú'un luu xa'an ío iní-ya. ⁸Te jíin tú'un-ún ni chítú ndíi añú-yo onde jíin táká tú'un ndíchi, tu'un júku'un iní. ⁹Te tiñu ja ní chaa iní máá-yá sáá, ja kúsi iní máá-yá sá'a-ya kuní-ya, chi tu'un sa'í-ún ni stá'an-ya núu-yo. ¹⁰Chi onde ná jínu va'a kivi te kuní Dios ja in ká'nu-na nduu ndi'i-ni iní nda'a Cristo, vasa ja ká'io iní andívi xí vasa ja ká'io iní ñuyívi. ¹¹Te jíin Cristo ni kani'in-yo tá'u-yo. Te ni teta'an Dios yóo, nátu'un ni chaa iní máá-yá, I'a sá'a taká-ni ndasa jata'an iní máá-yá, ndasa kúsi iní máá-yá. ¹²Súan ni sá'a-ya, náva'a máá-yó, ja xná'an-ga ni kañukuu iní-yo Cristo, ná nákana jaa-yó-yá jíin tú'un luu máá-yá. ¹³Te suni róo, ni kajini so'o-ró tú'un ndaa. Te jíin tú'un va'a-ún ni kakaku-ró. Te nuu máá Cristo ni kakandíja-ró. Te suni máá Espíritu Santo ja ní chíso tú'un-ya, ni chaa sello iní añú-ro. ¹⁴Yúan kúu seña ja ní'in-yo tá'u-yo, onde ná

táin-yó máá. Yúan-na te nakana
jaa-yó tú'un luu-ya já sikí-ún.

Tu'un ni jikān ta'u Pablo ja'a yóó

¹⁵Te suni ruu, ni jini tu'un-ri ndasa kākandija-ró núu máá Jító'o-yo Jesús, jíin ndasa kúndá'ú iní-ro táká ñáyivi ndóo. ¹⁶Te ja yúan tú júkuiñi-ri ja nákuatá'ú-ri ja róo jíná'an-ró, te núku'un iní-ri róo nú jikān ta'u-ri, ¹⁷náva'a kuni-ro núu máá Dios, I'a xiin máá Jító'o-yo Jesucristo, máá Táa-yo, I'a ndiso tu'un luu, te náva'a ná kuá'a-ya modo ndíchí, te stá'an ndijin-ya tú'un nuu-ro. ¹⁸Te stúun-ya iní añú-ro, náva'a kuni-ro ndéja kúu tu'un ñúkuu iní-ro sikí já ní kana-ya xiní-ro, te ndéja kúu ta'u lúu xaān ní'in-yá sikí ñáyivi ndóo. ¹⁹Te kuni-ro ndasa ni'in xaān sátiñu-ya já'a róo, ñáyivi kākandija, chi fuerza téyí ndiso-ya. ²⁰Te fuerza-ún, ni jatíñu Dios kivi ní naschakú-ya Cristo ma'ñú ndíyi, jíin já ní súnqoo-ya Cristo ichi ndává'a-ya ondé andívi. ²¹Te ni jani-ya Cristo sikí táká ja kátá'ú tíñu, jíin já kándiso tíñu, jíin já kátjin so'o, jíin já kakuñá'nu, jíin sikí táká sí'v'í já káskúnán-i, nasu níni kuiā yá'a, chi suni taká kuiā chaā. ²²Te taká-ni ni jañu Cristo sukun ní sá'a Dios. Te ni nduu Cristo xiní núu máá tíku'ni kākandija, ni sá'a-ya sikí táká-ni. ²³Te tíku'ni-ún kúu nátu'un yiki kúñu Cristo, te chítú máá-i jíin máá-yá, chi I'a schítú ní ká'nu-ni kúu-ya.

Ndasa ni nama-ya-yó

2 Te máá-yá, ni naschakú-ya róo, ja á ni kaji'i-ro ní sá'a

kuachi-ró jíin já ní kasáña'mu-ró.

²Chi ni kajika-ró jíin máá yúan sáá, nátu'un kasá'a-i iní ñuyívi yá'a, nátu'un kuni máá já tá'ú tíñu nuu tachí. Yúan kúu tachí já sátiñu jíin ñáyivi ní'in iní ío vina. ³Te suni taká máá-yó ní kajika-yó jíin ñáyivi-ún sáá, ni kasá'a-yó tíñu ni kakani iní-yo, ni kaskíkuu-yó tíñu ni kuni yiki kúñu-yó jíin tíñu ni kajani iní-yo, te ni kakuu-yó ñáyivi ní kití iní-ya núu, nátu'un nuu sáva-ga-i. ⁴Ko iní Dios yí'i kua'a tú'un kúndá'ú iní, te ni kundá'ú xaān iní-ya yóó. ⁵Te nini ni kakuu-yó ndíyi ni sá'a kuachi-ún, te ni naschakú-ya yóó jíin Cristo. Te jíin tú'un luu ío iní-ya te ni kakaku-ró. ⁶Te iin núu-ni ni ndukani-ya yóó jíin Cristo. Te suni súan ni súnqoo-ya yóó onde andívi jíin Cristo Jesús, ⁷náva'a ní-gá kuiā ja cháa-ga, stá'an-ya ndasa kua'a xaān já lúu ío iní-ya jíin tú'un kúmani-yá jíin-yó jíin Cristo Jesús. ⁸Ni kākandija-ró, te ja yúan ní kakaku-ró ní sá'a tu'un luu ío iní-ya. Te nasu máá-ró ní kíñi'in, chi ta'u já ní ja'a Dios nuu-yo kúu. ⁹Nasu sikí tíñu sá'a-yó ní kakaku-yó, te ja yúan tú ni iin-i kuu sátéyí-i máá-i. ¹⁰Chi máá-yá ni sá'a yóó. Te ni sáva'a-ya yóó nuu Cristo Jesús, náva'a sá'a-yó táká tíñu va'a. Chi jíin kivi, ni sátu'a Dios tíñu-ún ja káka kuu-yó jíin. ¹¹Núsáá te ná núku'un iní-ro já chí ñáyivi sáin naciōn ni kakaku-ró sáá. Onde sáá, chi nání-de chaā ni kaxití ndúu kuñu-de ja ní sá'a nda'a. Te chaā-ún, ni káskúnání-de róo: Ñáyivi tú ní káxiti ndúu. ¹²Te suni ná núku'un iní-ro já ondé kivi sáá, tú ní ká'iin-ró jíin Cristo. Jíká ní ka'iin-ró jíin ñáyivi níñu Israel. Te jíká xaān

ni ka'io-ró jíin tú'un ni keyu'u-yá, ni tú ní kañukuu iní-ro, ni Dios, tú ní jíka-ya jíin-ró iní ñuyivi yá'a. ¹³Ko vina jíin Cristo Jesús, te róo ja ní ka'lin jíká-ró onde kivi sáa, chi a ni kakuyani-ró ní sá'a niñi Cristo. ¹⁴Chi máa-yá kúu paz nuu-yo, te ja ndéndúú ñuu-ún ni nasá'a-ya ñin-na, chi ni stuncháa-ya máa xé'nú já ní sásin yóo ni kandij sava ma'ñú-yó. ¹⁵Te xé'nú-ún ja ní skánaa yóo kúu taká tu'un tá'u tínu jíin táninu ndiso máa. Te jíin yíki kúnu-ya ní xnáa-yá taká yuán, náva'a naskétá'an-ya ndéndúú-ún núu máa-yá, te nduu ñin-na ñayivi jáa, te ja yuán sá'a-ya paz, ¹⁶te suni náva'a jíin máa cruz te naskétá'an-ya ndéndúú yuán jíin Dios, chi ñin-na ñayivi ní nduu-ún, te jíin cruz ni xnáa-yá máa já ní kajito u'u tá'an. ¹⁷Te ni kii-ya, te ni jani-ya tú'un paz nuu-ro, já ní ka'lin jíká-ró núu-yá, jíin núu ñayivi já ní ka'lin yani. ¹⁸Chi ja máa-yá kúu ja núña ichi kivi koyo ndendúú-yo núu máa Táa-yo, sá'a suni ñin-ni máa Espíritu. ¹⁹Núsáa te tuká kákuu-ró ñayivi jíká, ni ñayivi tatú, chi ñin-na ni kanduu-ró jíin ñayivi ndoo, te suni tá'an se'e Dios kákuu-ró. ²⁰Te ni kaja'nu máa-ró sikí cimienta ja kákuu apóstol jíin cháa ni kájani tu'un. Te máa Jesucristo kúu yuu ndiso jiki. ²¹Te ní vé'e jákutá'an jíin máa-yá, te já'nu kua'an náva'a nduu ñin ve'e ij sá'a máa Jíto'o-yo. ²²Te suni ni kanduu-ró ñin ve'e ni sá'a-ya, náva'a kunchaa Dios iní jíin máa Espíritu.

Tu'un yí tu'un sa'í ndiso Pablo

3 Te ruu Pablo, ja yuán kándeer-ri vekaa ja sikí Cristo Jesús ja'a

róo, ñayivi sñin nación jíná'an-ró. ²Te ni kajini tu'un-ró ndasa ni ja'a Dios tu'un luu ío iní-ya núu-ri ja'a róo, jáni iní-ri. ³Chi ni stá'an ndijin-ya tú'un sa'í-ún nuu-ri, nátu'un ni chaa-ri yakú tu'un nuu-ro ká'an ichi yatá. ⁴Te nú ka'u-ró, te a kuu juku'un iní-ro ndéja kúu tu'un sa'í Cristo ja jini-ri. ⁵Te tu'un-ún tú ní stá'an-ya núu ní ñin se'e chaa ní kúia ni kii ichi yatá. Ko vina ni stá'an ndijin Espiritu-ya núu taká apóstol ndoo-ya, jíin núu cháa kájani tu'un-ya. ⁶Te tu'un-ún ká'an ja ñayivi sñin nación, suni ná ní'in tá'an-i ta'u-í, te ñin-na ñayivi ná nduu-i jíin-yó, te ja ní keyu'u-yá ná ní'in tá'an-i sá'a Cristo jíin máa tú'un va'a. ⁷Te sikí tú'un-ún játiñu máa-ri. Te ta'u-ún ni ja'a tu'un luu ío iní Dios nuu-ri, te jíin fuerza-ya ní sá'a-ya-ún. ⁸Ruu kúu cháa súchí-ga vása ñayivi ndoo súchí xáan, te nuu máa-ri ni ja'a-ya tá'u lúu yá'a ja jáni-ri tu'un va'a nuu ñayivi sñin nación, ndasa va'a xaan kaa tu'un Cristo, ⁹jíin já stá'an ndijin-ri nuu taká-i ndasa koo máa tú'un sa'í ja ní yisa'í onde sáa iní máa Dios, I'a ni sá'a taká-ni. ¹⁰Náva'a taká ja kátá'u tínu jíin já kakuñá'nu ichi ándíví, ná kuní jíná'an ndasa kua'a xaan tú'un ndichí Dios ío, sá'a tiku'ni. ¹¹Nátu'un ni chaa iní-ya ní káni, te ni skíkuu-ya ní sá'a-ya-ún jíin Jíto'o-yo Cristo Jesús. ¹²Te káandíja-yó-yá. Te ja yuán máa-yá sá'a ja káchundéé iní-yo, tú yú'ú-yo, kivi koyo-yó núu Dios. ¹³Ja yuán ká'an nda'ú-ri jíin-ró, ja má kúku'í'a iní-ro sá'a tundó'o jíto-ri ja sikí róo, chi sua ndeá-ga tu'un

luu iní máá-ró sá'a. ¹⁴Ja yúan kúu ja júkuiñi jítí-rí núu máá I'a kúu Taa Jito'o-yo Jesucristo. ¹⁵Te nuu máá-yá kenda sí'ví táká tata ká'io andí'ví jíin ja ká'io iní ñuyívi, ¹⁶chi tu'un luu xaan ío iní-ya, te jikán ta'u-rí nuu-yá ja súan ná yíja va'a iní añú-ro sá'a-ya jíin fuerza ndiso máá Espíritu. ¹⁷Te suni jikán-ri ja ná kúnchaa Cristo iní añú-ro jíná'an-ró sá'a ja kákandíja-ró, náva'a ná kuikín va'a tu'un kúndá'ú iní tá'an iní-ro, ¹⁸te suni náva'a kuu juku'un va'a iní-ro, jíin táká ñayívi ndoo, ndasa kaa tu'un jichá, tu'un káni, tu'un kúnú, tu'un súkún, cuenta máá-yá, ¹⁹te suni náva'a ná kuní-ro ndasa kúndá'ú iní Cristo yóo, vasa tú kúu juku'un iní-yo tú'un-ún, te náva'a ku'un chítú ndí-ro jíin kú'a ñú'un chítú Dios. Achí-ri. ²⁰Máá-yá, kúu I'a sá'a va'a xaan-gá vásá ja kájani iní-yo xí ja kájikan-yo, chí jíku fuerza-ya iní-yo. ²¹Te nuu máá-yá, ná nákana jaa tiku'ni kákandíja sá'a Cristo Jesús. Te súan ná koo ní káni ní kuiá, onde taká kuiá chaa. Súan ná koo. Amén.

Iin-ni kakuu-yó sá'a Espíritu

4 Ruu, chí kánde-ri vekaa sikí máá Jito'o-yo. Te ká'añ nda'ú-ri jíin-ró ja ná kaka kuu-ró nátu'un ío jíin'ún sikí ja ní kana-ya xiní-ro. ²Te ná koo súchí vá'a iní-ro. Te ná koo vitá iní-ro. Te jíin tú'un kúndá'ú iní, te jíin paciencia, ná kuándéé iní-ro jíin tá'an-ró. ³Ná kuítú iní-ro ja iin-na naketá'an-ró jíná'an-ró iní máá Espíritu sá'a tu'un kuaká'nu iní. ⁴Chí iin-na ñayívi ío, te suni iin-ni Espíritu, suni nátu'un ni kana-ya xiní-ro ja

iin-ni tu'un kuñukuu iní-ro, chí yuán kúu ja ní kana-ya xiní-ro, ⁵te suni iin-ni máá Jito'o-yo ío, jíin iin-ni tu'un kándíja, jíin iin-ni tu'un jánducha, ⁶jíin iin-ni máá Dios Taa xiní táká-yo, chí máá-yá ndíto taká-ni, te máá-yá ni sá'a taká-ni, te jíin ndí'i-ni ncháa-ya. ⁷Ko ná iin ná iin-yó, kúta'u-yo tú'un luu ío iní máá-yá ndasa ku'a já'a máá Cristo nuu-yo. ⁸Ja yúan ká'an tutu: Nuú ní ndaa-ya kuá'an-ya ándí'ví, ni stútú-yá kua'a ja ní yindasu te kua'an-ya jíin. Te ni jacha nuu-ya tá'u núu táká ñayívi, áchí. ⁹Te ja súan ká'an: Ni ndaa-ya kuá'an-ya, suni kuní ka'an ja ní kuun-ya ní ja'an-ya onde nuu kúnú-ga chíi ñu'un. ¹⁰I'a ni kuun, suni máá-yá kúu I'a ni ndaa kua'an onde nuu súkún-ga andí'ví, náva'a skíkuu-ya jíin táká tiñu. ¹¹Te suni máá-yá, ni teta'an-ya sáva ñayívi kí'in apóstol, te sava-ga kani tu'un-ya, te sava-ga skuikín tu'un va'a, te sava-ga kundito tiku'ni, te sava-ga stá'an. ¹²Súan ni teta'an-ya, náva'a ná yíja va'a ñayívi ndoo, jíin ja kuátíñu nuu-í, náva'a ná kuá'nu tiku'ni Cristo sá'a. ¹³Súan te ná náketá'an iin núu-yó jíin tú'un kándíja, jíin tú'un kuni-yo núu Sé'e Dios. Te suni ná yíja va'a-yó nátu'un iin-na-yo, onde chítú kú'a Cristo iní-yo. ¹⁴Yuán-na te ma nátu'u iní-yo cuenta suchí lúli, ni ma kivi nduu-yo yá'a yúan jíin sáin sáin sa'an, ndasa kuní chaa xndá'ú ja kándúkú-de tiin yátá-de yóo, sana iní-yo sá'a-de. ¹⁵Chí sua ná kútiin-ró tú'un ndaa jíin tú'un kúndá'ú iní, te ná kuá'nu-ró jíin táká tiñu kuní máá I'a kúu xiní, te I'a-ún kúu Cristo.

¹⁶Te in_i máa-yá, iin-na káñtá'an níí tiku'ni, te ndítin tá'an taká nátu'un taká va, te ná iin ná iin játiñu ndasa xín tíñu. Te xndea tá'an te skuá'nu tá'an jíin tú'un kúndá'ú in_i.

Ñayivi ñúndijin

¹⁷Tu'un yá'a ká'an-ri, chí ká'an ni'in-ri jíin-ró cuenta máá Jító'o-yo, ja má káka-ga-ro nátu'un kájika sava-ga ñayivi sñin nación, chí kájika kuu-i jíin tú'un kájani sáni in_i máa-i. ¹⁸Ni kakuñaa nú jiní tuní-i. Te tú ñú'un kuti vida Dios in_i-i, chí tú kájin_i-i nuu máa-yá, chí ni'in in_i añú-i. ¹⁹Te ñayivi-ún, ni kayija-i jíin máá tú'un ni'in in_i. Te ni kivi koyo-i jíin tú'un kuaxán ja ná kuítú in_i-i sá'a-i taká tiñu chá'an. ²⁰Ko róó jíná'an-ró, nasu súan ní káskuá'a-ró íchi Cristo. ²¹Te súan ni kajini so'o-ró tú'un-ya, te ni kakutu'a-ró ní sá'a-ya, nátu'un ío ndaa tu'un jíin Jesús. ²²Ná cháxio-ró máá cháa tú'ú kí'in-de jíin taká tiñu ni jika-ró jíin-de ichi yatá, chí máni kuchá'an-de jíin taká tiñu ñáá sá'a-de kuní-de. ²³Te ná ndújjáá modo kájani in_i-ro. ²⁴Te ná núku'un-ró cháa jáa, ja ní kuva'a-de nátu'un káa máá Dios jíin tú'un ndaa, jíin tú'un ndoo ndija. ²⁵Núsáa te ná sía-ro tú'un xndá'ú, te ná ká'an ndaa-ro jíin taká tá'an-ró, chí pedazo-yo kánakun_i tá'an-yó. ²⁶Nú kit_i in_i-ro te ma sá'a-ró kuáchi. Ni ma kuá'a-ró tú'un ja kit_i in_i-ro ondé kee ndikandii. ²⁷Ma kuá'a-ró tú'un kukuu ja'ú jíin-ró. ²⁸Ñayivi ní sakuí'ná, ma sakuí'ná-ga-i, chí sua ná sátiñu-i. Ná tñin-i taká tiñu va'a jíin ndá'a-i, náva'a ná ní'in-í najjín kuá'a-i nuu ñayivi kánandi'i.

²⁹Ni iin tu'un chá'an ma kenda yu'u-ro, chí sua ná ká'an-ro tú'un va'a ja skuá'nu tá'an, náva'a ñayivi jini so'o-ún ná kéndoo luu in_i-i sá'a. ³⁰Nde'é-ró náva'a ma kukuí'a in_i Espiritu Santo Dios sá'a-ró, chí jíin Espiritu ni jaxin-ya sello róó, onde jinu kivi nákuuan-ya yóó.

³¹Taká tu'un ua, jíin tú'un xaan in_i, jíin tú'un kit_i in_i, jíin tú'un kákanaa, jíin tú'un ká'an ndiva'a, ná cháxio-ró jíin taká tiñu jito u'u tá'an. ³²Chí sua ná kúman_i-ro jíin tá'an-ró. Ná kúndá'ú in_i-ro tá'an-ró. Ná sá'a-ró táká'nu in_i-ro núu tá'an-ró, nátu'un ni sá'a Dios tuká'nu in_i-ya núu-ro sikí Cristo.

5 Te róó, ná ndaku-ró Dios nátu'un se'e máa-yá ja maní jíin-yá. ²Te kaka kuu-ró jíin tú'un kúndá'ú in_i, nátu'un ni kundá'ú in_i Cristo róó, te ni soko-yá máa-yá ja sikí róó, te ni ja'an asun-yá ni soko-yá máa-yá ja ní ja'a-ya máa-yá nuu Dios. ³Ko tu'un téné, jíin taká tu'un chá'an, xí tú'un tóó in_i, ni ma ndátu'ún-ró súan jíná'an-ró, chí tú súan kásá'a ñayivi ndóo. ⁴Ni ma koo tu'un chá'an, ni tu'un ñáa, ni tu'un ndiyi, chí túu sá'a luu. Chí sua ná nákuatá'ú-ró. ⁵Chí a kájin_i-ro já ío ndaa tu'un yá'a, ja ní iin ñayivi kájika téné, xí já kásá'a chá'an, xí já tóó in_i (chí iin-ni kúu-ún jíin já kájatíñu nuu ndosó), tú nani'in tá'u kúti-í ndivi-i in_i nuu nuu tá'ú Cristo tiñu jíin Dios. ⁶Koto-ró, ma xndá'ú ni iin-i róó jíin tú'un sáni, chí ja sikí taká tu'un yá'a te cháa tu'un kit_i in_i Dios sikí taká-i ja tú káandatu-i. ⁷Ma kivi nduu-ro jíin-i núsáa. ⁸Chí kivi sáa, ni káichaku-ro sikí ñúñáa, ko vina, a káichaku-ro sikí ñúndijin

nuu máá Jító'o-yo. Ná káka kuu-ró nátu'un kájika kuu ñayivi ñúndijin núsáá. ⁹Chì tínu sá'a Espíritu kúu taká ja vá'a, taká ja ío ndaa, taká ja ío ndija. ¹⁰Ná ndúkú víi-ro taká ja kúsiñ iní máá Jító'o-yo sá'a-ró. ¹¹Te ma kivi nduu-ro jíin tínu ñuñáa ja tú ní'in tínu, chí sua ná kána jíin-ró núu. ¹²Chì kúka nuu-yo ká'an-yo tínu kásá'a sa'l'i. ¹³Ko taká tu'un ja á ni tuun nuu, jiní ndijin-yo núu sá'a luz, chí luz kúu ja kíni'in ndijin taká-ni. ¹⁴Ja yúan ká'an: Róo ja kákixi, natá'ú núu-ro, ná ndúko-ro má'nú ndíyi, te Cristo ná stúun-ya núu-ro, áchí. ¹⁵Núsáá te nde'lé vá'a-ró ndasa kájika ñúkuún-ró, nasu nátu'un chaa káñáá, chí nátu'un chaa ndíhí. ¹⁶Ma stíví-ró tiempo, chí kándañáá kivi yá'a. ¹⁷Núsáá te ma ndúñáá xiní-ro, chí sua ná júku'un va'a ini-ro naún tínu játa'an ini máá Jító'o-yo. ¹⁸Ma kóo ká'vá-ró sikí vino, chí jíin yúan te jita sáni-ró. Chí sua ná kútú Espíritu ini-ro. ¹⁹Te ka'an jíin tá'an-ró jíin salmo, jíin yáa máá-yá, jíin yáa Espíritu. Te ichi iní añu-ro ná káta-ró te ná chíñú'un-ró máá Jító'o-yo. ²⁰Te nene nakuatá'ú-ró núu máá Taa-yo Dios sikí taká-ni, jíin sí'ví máá Jító'o-yo Jesucristo.

Tu'un kuandatu-yo núu tá'an-yó

²¹Te kuandatu-ro núu tá'an-ró, chí káchiñú'un-ró Dios. ²²Te ñásí'í, ná kuandatu-ña núu yíi máá-ña, nátu'un nuu máá Jító'o-yo. ²³Chì yíi kúu xiní ñásí'í, nátu'un Cristo kúu-ya xiní tíku'ni. Te máá-yá kúu l'a náma-ún. ²⁴Chì nátu'un tíku'ni kájandatu-i nuu Cristo, suni súan ñásí'í ná kuandatu ndí'i-ña núu yíi

máá-ña. ²⁵Te róo yíi jíná'an-ró, ná kúndá'ú ini-ro ñásí'í-ro, nátu'un ni kúndá'ú ini Cristo tíku'ni-ya. Te ni ja'a-ya máá-yá ja tíku'ni-ún, ²⁶náva'a nasándoo-ya, te nakacha-ya-ún jíin máá tú'un, nátu'un ini nuu ndúndoo jíin ndúcha, ²⁷náva'a koo iin tíku'ni luu kundii nuu máá-yá, ja tú kundiso cha'an, ni tú tí'yí, ni iin ja súan, chí sua ná kóo ndoo, ma kúnchaa cha'an. ²⁸Suni súan taká yíi, níni ná kúndá'ú ini-de ñásí'í máá-de, nátu'un jíin máá-de. Chí chaa kúndá'ú ini-de ñásí'í-de, máá-de kúndá'ú ini-de. ²⁹Chì tú ni iin chaa jító u'u-de máá-de, chí sua skée-dé te jító ñúkuún-de máá-de. Suni súan sá'a Cristo jíin tíku'ni-ya. ³⁰Chì nátu'un pedazo máá-yá kákuu-yó, yiki-yá, kuñu-ya. ³¹Ja yúan skéndo chaa táa-de náa-de, te kétá'an-de jíin ñásí'í-de, te iin-ña kákuu ndendúu-de. ³²Yíi xáan kaa tu'un sa'lí yá'a. Ko ruu, chí cuenta sikí Cristo jíin sikí tíku'ni ká'an-ri. ³³Ko ná iin ná iin róo, ná kúndá'ú ini-ro ñásí'í máá-ró, nátu'un kúndá'ú ini-ro máá-ró. Te suni ñásí'í, ná kóo ja jíñú'un-ña núu yíi-ña.

6 Hijo, kuandatu-ro núu táa-ro, nuu náa-ro sikí máá Jító'o-yo, chí yuán kúu ja vá'a sá'a-ró. ²Chì ya'á kúu xna'an-ga tu'un ja ndíso ta'u, ni tá'ú-yá tínu: Koo ja jíñú'un-ró núu táa-ro núu náa-ro, ³náva'a ná kéndoo va'a-ró, te ná'an kúchaku-ro iní ñuyívi yá'a. Achí. ⁴Te róo, táa jíná'an-ró, ma skití-ro iní se'e-ró jíná'an-i, chí sua ka'nu-ro-í, te stá'an-ro núu-í sikí máá Jító'o-yo. ⁵Róo mozo jíná'an-ró, kuandatu-ro núu patrón-ro ñuyívi

yá'a, jíin tú'un jíinú'ún, jíin tú'un yú'ú, jíin tú'un koo kájí iní añú-ro, nátu'un nuu Cristo. ⁶Ma sá'a-ró tíñu ja kúsi iní ñayivi ndé'é-i nuu, chí sua sá'a-ró nátu'un mozo Cristo. Te kuu iní-ro sá'a-ró já játa'an iní Dios. ⁷Te jíin iní jíin añú-ro kuatíñu-ró. Te kani iní-ro já núu máá Jító'o-yo játíñu-ró, nasu núu ñayivi. ⁸Chí a kájini-ro já nú tiñu va'a sá'a in in-ro, jíin yá'a te nani'in-ro yá'u-ró núu máá Jító'o-yo, vasa mozo xí cháa jíka kuu ndicha-na. ⁹Te róo patrón jíná'an-ró, suni súan sá'a-ró jíin-i, te ma síyú'ú-ro-í, chí a kájini-ro já ío Jító'o máa-i jíin máa-ró ondé andíví, te in núu-ni ndíto-ya táka ñayivi.

Ná kúkútu-yo jíin táka tu'un Dios

¹⁰Te in-na tu'un ío, ñāni māni: Ná kuñi ni'in-ró jíná'an-ró sá'a máá Jító'o-yo jíin fuerza sátiñu máa-yá. ¹¹Ná kúkútu-ro jíin táka tu'un Dios náva'a ma kaka yátá-ró sá'a ja'ú ja ndúkú tñin yátá róo. ¹²Chí nasu kájatá'an-yó jíin cháa yí'i niñi jíin kúñu, chí sua jíin já kakuñá'nu, jíin já kátjin so'o, jíin táka jító'o ñuyívi yá'a, ja kátá'ú tíñu ñuñáa yá'a, jíin táka tachi ñáa kájika nuu tachi. ¹³Núsáa te ná kúkútu ndí'i-ró jíin táka tu'un Dios, náva'a ma kaka yátá-ró kivi ío tundó'o. Te kundij ni'in-ró ondé nú ni ndí'i ni jinu ni sá'a-ró. ¹⁴Núsáa te kuñi ni'in-ró jíná'an-ró. Te chiva'a-ró tú'un ndaa, nátu'un ná kúnu'ni sánchij-i-ró. Te ná kú'un-ró tú'un

skéndoo ndaa-ya róo, nátu'un in su'nu káa. ¹⁵Te ná kí'vi-ró tú'un va'a tu'un vindáa vinené, nátu'un ndijan iní ja'a-ro. ¹⁶Te ío in-na tu'un kánúu: Jíin tú'un kándija te kasu-ro máa-ró, nátu'un in nuu tú'ma-ró, chí jíin yúan te kuu nda'va ndí'i-ró yáa ññ'un ja skée ja'ú nátu'un ndua. ¹⁷Te ná kú'un-ró tú'un nama róo, nátu'un kachíní káa. Te nátu'un machete, kuatíñu-ró tú'un Espíritu, chí yúan kúu tu'un Dios. ¹⁸Te nene kakan ta'u-ro te ka'an nda'ú-ro jíin-yá, te ná kakán ta'u-ro sá'a máa Espíritu. Te ja yúan ná koo ndito iní-ro, te ja'a táka ñayivi ndóo ná kakán ta'u-ro, te ná ká'an nda'ú-ro. ¹⁹Te suni ka'an-ro já'a-rí, náva'a ná chundéé iní-ri ndika-ri yu'u-rí kani-ri tu'un va'a tu'un sa'í-ya, ²⁰te ka'an vatu máa-rí ndasa kánúu ká'an-ri, chí ja sikí tú'un-ún jíka kuu-ri, te nú'ni-ri. ²¹Tíquico kúu chaa játíñu te skíkuu va'a-de tíñu máá Jító'o-yo, te maní-yo jíin-de. Te suni kastu'ún-de nuu-ro ndasa kua'an tíñu jíku-ri jíin, náva'a kuni ndí'i-ni-ró. ²²Máa já yúan-ni tájí-rí-de kujaa-de nuu-ro, náva'a kuni-ro ndasa kakuu-ri, te ndundéé iní añú-ro sá'a-de. ²³Tu'un kuaká'nu iní, jíin tú'un kúndá'ú iní, jíin tú'un kándija, ja kí nuu máá Taa-yo Dios jíin núu máá Jító'o-yo Jesucristo, ná koo jíin táka ñani-yo. ²⁴Tu'un luu ío iní-ya ná koo jíin táka ñayivi maní ndíja-i jíin Jító'o-yo Jesucristo. Súan ná koo. Amén.